



FAKULTET ZA INTERNACIONALNI MENADŽMENT
U TURIZMU I HOTELIJERSTVU

MILOČER

NAUČNO-NASTAVNO VIJEĆE

Broj:

Miločer, 06.02. 2014. godine

Na osnovu člana 46 stav 1 alineja 18 Statuta HEC Fakulteta za internacionalni menadžment u turizmu i hotelijerstvu Miločer (u daljem tekstu: Fakultet), Naučno-nastavno vijeće Fakulteta na VI sjednici održanoj 06.02.2014. godine donijelo je

KODEKS AKADEMSKE ETIKE

Predmet

Član 1

Ovim kodeksom definišu se osnovna načela u radu akademskog osoblja, uvrđuje njihova odgovornost prema studentima, kolegama i Fakultetu i određuje društvena misija akademskog osoblja.

Osnovna načela

Član 2

Osnovna načela akademske etike određuju se kako slijedi:

1. sloboda naučno- istraživačkog rada i nastavnih metoda primarne su vrijednosti akademskog života;
2. akademsko osoblje u svom radu, djelovanju i ponašanju dužno je da se drži etičkih načela, naučne istine i kritičnosti i da štiti ugled Fakulteta;
3. akademsko osoblje dužno je da se ponaša po načelima akademske slobode, etičke i intelektualne odgovornosti, da njeguje vrijednosti raznovrsnog mišljenja, sistematske sumnje i lične inicijative;
4. profesionalna sloboda, naučna radoznalost i istraživački duh ne mogu biti opravdanje za povredu osnovnih prava čovjeka i dostojanstva kolega, studenata ili drugih građana;
5. profesionalnoj slobodi imanentna je dužnost akademskih građana da unapređuju sopstvena znanja i vlastite kompetencije, razvijaju i podstiču kritičku misao, uzdižu akademske slobode i slobodu duha, pravično koriste, šire i prenose znanja i u svakom drugom pogledu ispoljavaju intelektualno poštenje;
6. istraživanje i nastavna djelatnost u školi moraju biti moralno i intelektualno nezavisni od svakog političkog autoriteta i ekonomske moći;

7. akademsko osoblje ima posebnu dužnost da dalje širi u javnosti pojam akademske slobode;
8. akademsko osoblje dužno je da čuva slobodu naučno-istraživačkog i nastavnog rada i štiti čast svog poziva i ne smije da zloupotrebljava autoritet svoje profesije radi ostvarivanja ličnih interesa ili u političke svrhe;
9. akademsko osoblje dužno je da unapređuje potrebu za evropskom dimenzijom, posebno u razvoju nastavnih programa, međuinstitucionalnoj saradnji, programima mobilnosti i integrisanim programima studija, obuke i istraživanja;
10. akademsko osoblje dužno je da promoviše humanističke principe i ljudska prava, razvija intelektualne vještine, podržava razvoj tolerancije i otvorenosti i podstiče profesionalnu radoznalost;
11. usputni interesi u određenim prilikama ne smiju nikada da ugroze ili kompromituju akademsku slobodu, istraživački i stvaralački duh pripadnika akademskog osoblja;
12. kada pripadnik akademskog osoblja ocijeni da se od njega zahtijeva djelovanje koje je u suprotnosti sa njegovim etičkim načelima ili ličnim, naučnim i intelektualnim uvjerenjima ili savješću, dužan je da pokrene raspravu o toj temi. Ako rasprava pokaže da su njegove ocjene bile opravdane, ili ako se okonča bez jasnog stava, ili ako do rasprave uopšte ne dođe bez njegove krivice, Fakultet će podržati pravo predstavnika akademskog osoblja da se ponaša po svojoj savjesti;
13. akademsko osoblje je slobodno da razvija originalni metod istraživanja i sopstveni stil predavanja.

Odgovornost prema studentima

Član 3

Rad sa studentima karakterišu sljedeće odrednice:

1. najviša odgovornost akademskog osoblja je da doprinese intelektualnom i profesionalnom razvoju studenata;
2. akademsko osoblje dužno je da poštuje dostojanstvo studenata i ne smije da pravi razlike razlike po osnovu rase, boje, vjere, pola, nacionalnog porijekla, bračnog stanja, političkog ili vjerskog ubjeđenja, porodičnog ili socijalnog porijekla studenta;
3. akademsko osoblje treba da podstiče svoje studente na slobodan i ozbiljan prilaz učenju, primjenjujući najbolje moralne, profesionalne i stručne standarde u nastavi;
4. isključivi kriterijumi za ocjenjivanje studenata su: znanje, razumijevanje i uloženi trud. Akademsko osoblje dužno je da se dosljedno suprostavi svim intervencijama u vezi sa ispitima;
5. doprinos ili pomoć studenata u nastavi dostojna je poštovanja i opravdava mjere pozitivne diskriminacije u ocjenjivanju;
6. akademsko osoblje ne smije uslovljavati ispunjenje nastavnih obaveza studenata i polaganje ispita kupovinom određene literature ili drugih nastavnih pomagala, seksualnim ponudama i ucjenama, kao i materijalnim i drugim iznudama;

7. pripadnik akademskog osoblja poštuje kao povjerljive informacije koje kao takve dobije od studenta;

8. akademsko osoblje ne smije posredno ili neposredno iskorišćavati, zloupotrebjavati, šikanirati, ucjenjivati i diskriminirati studente, niti se prema njima ponašati na nedoličan ili drugi način koji vrijeđa njihovo dostojanstvo;

9. pripadnik akademskog osoblja ne smije sprječavati studente da preduzimaju nezavisno istraživanje u traganju za znanjem, niti smije sprječavati pristup različitim gledištima;

10. pripadnik akademskog osoblja dužan je da uloži razuman trud da zaštiti studenta od okolnosti koje su štetne po njegovo učenje, zdravlje ili bezbjednost.

Odgovornost prema kolegama

Član 4

U međusobnim relacijama sa kolegama i pri javnom istupanju akademsko osoblje dužno je da:

1. njeguje kolegijalne odnose zasnovane na međusobnom uvažavanju, poštovanju i razumijevanju, vodeći računa o zajedničkim akademskim vrijednostima;
2. njeguje kulturu argumentovanog dijaloga u naučnim radovima, javnom djelovanju i u međusobnim odnosima;
3. ne primjenjuje laudativni pristup radovima drugih i ne uzdržava se od kritike zbog ličnih interesa;
4. poštuje lično i profesionalno dostojanstvo mlađih kolega i da se brine o njihovom nastavnom i naučnom razvoju;
5. poštuje lično i profesionalno dostojanstvo svih zaposlenih na Fakultetu;
6. poštuje i brani stvaralačku slobodu saradnika;
7. ukaže na neetičko ponašanje svog kolege, odnosno na kršenje odredbi ovog kodeksa.

Odgovornost prema Fakultetu

Član 5

U odnosu prema Fakultetu:

1. akademsko osoblje dužno je da u javnim nastupima i djelovanju promoviše humanističke vrijednosti, ugled struke i akademske zajednice i čuva lično i profesionalno dostojanstvo kolega;
2. akademsko osoblje čuva integritet i dostojanstvo akademske institucije i radi po svom najboljem znanju, savjesno, pošteno, kulturno i posvećeno;

3. akademsko osoblje poštuje pravila institucije, što ne ograničava akademsku slobodu da kritikuje i mijenja pravila;
4. u slučaju angažmana izvan Fakulteta, karakter i obim obaveza pripadnika akademskog osoblja mora biti usklađen sa radom i interesima Fakulteta;
5. akademsko osoblje dužno je da vodi računa o sukobu interesa i nespojivosti drugih javnih i privatnih funkcija i poslova sa akademskim statusom;
6. protekcijonizam, lobiranje, ucjene i pritisci, mito i korupcija i drugi oblici nečasnog uticanja na kršenje stručnih kriterijuma i standarda u obavljanju akademskih poslova predstavljaju najgrublju povredu pravila akademskog ponašanja;
7. pripadnik akademskog osoblja ne smije da u javnom promovisanju ili reklamiranju koristiti naziv Fakulteta na štetu njegovih interesa;
8. akademskom osoblju u toku nastave nije dozvoljeno promovisanje stranačkih stavova.

Društvena misija

Član 6

U ostvarenju društvene misije:

1. akademsko osoblje dužno je da svojim autoritetom zastupa pozitivne akademske vrijednosti i da ih prenosi na širu društvenu zajednicu;
2. nastavne aktivnosti akademskog osoblja ne smiju ugrožavati kvalitet nastavnog i naučnog rada;
3. akademsko osoblje ne smije podsticati, prihvatati ili obavljati poslove protivno ugledu struke i akademske zajednice;
4. pripadnik akademskog osoblja ne smije da vrši javnu ili političku funkciju kako bi za sebe ili drugog obezbijedio profesionalne koristi;
5. pripadnik akademskog osoblja ne smije da prihvati javnu funkciju bilo kog nivoa ukoliko se ona suprotstavlja principima profesionalne objektivnosti;
6. pripadnik akademskog osoblja ne smije koristiti sredstva za masovnu komunikaciju samo radi promovisanja svoje ličnosti;
7. kada istupaju kao privatna lica, pripadnici akademskog osoblja su dužni da onemoguće stvaranje utiska da to čine u ime svojih kolega ili akademske institucije;
8. pripadnici akademskog osoblja ne smiju zloupotrebjavati akademski autoritet radi ostvarivanja ličnih, porodičnih i političkih interesa;
9. akademsko osoblje dužno je da razvija ekološku svijest.

Član 7

Etički odbor Fakulteta stara se o primjeni odredbi ovog kodeksa.

Struktra i sastav Etičkog odbora određiće se posebnim aktom.

Član 8

Ovaj kodeks stupa na snagu osmog dana od dana objavljivanja na web stranici Fakulteta.



NAUČNO-NASTAVNO VIJEĆE
PREDSJEDNIK

dr Marijana Mitrović - Mijatović